

REGIONAL NEWS BULLETIN

HEADLINES (MORNING)

1. Kumhlui thlan zan, halpuah hal runpui atanga darkar 36 hnu ah Aizawl boruak a let hnih chuangin a bawlhhlawh.
2. Nikum 2025 chhung khan Mizoram-ah ruihhlo kaihhnawh avangin mi 111 an thi a, kum 20 liam ta chhunga ruihhlo kaihhnawih avanga thi an tam ber kum a ni.
3. India chuan China lehpelin khawvela buhfai thar chhuak hnem ber a ni tawh tih Union Agriculture and Farmers Welfare Minister Shivraj Singh CHouhan chuan a sawi.
4. Prime Minister Narendra Modia chuan nimin khan internet kaltlangin National Volleyball Tournament wavi 72 na Uttar Pradesh-a Varanasi ah a hawng.



AIZAWL AQI

Mizoram Pollution Control Board (MPCB) khawlin a teh danin January ni 2 chhun dar 12:00 vel khan Aizawl Air Quality Index (AQI) chu 80 a ni a, hei hi halpuah hal runpui atanga darkar 36 hnu a ni.

MPCB-in boruak hrisel dan a enfiahna khawlpui ber Sikulpuikawna 'real time data' hmuh theihna chu Central lamah khawl a chian loh avangin kumhlui thlah zana zanlai data an hre thei lo a, pawl an tih thu an sawi. A tuk January ni 2 chhun dar 12:00 vel khan Aizawl AQI chu 80 a nih thu erawh chuan an hre thei a. Halpuah hal hma ni December ni 31 tlai dar 4:00-ah chuan AQI chu 38 a ni a, heta tanga a lan danin AQI hi a let 2 chuang hret (za zela 210)-in a pung a ni. Data atanga a lan danin boruaka bawlhhlawh sin te bik, particulate matter 2.5 micron, (PM2.5) hi Aizawl khawpuaiah a pung chho nasa hle niin an sawi baw. December thla bikah hian kum 2024 ah PM2.5 hi chawhrualin 19 µg/m³ chauh a nih laiin kum 2025 ah chuan 38 µg/m³ a kai chho tawh a, a letin a pung tihna ni an ti a ni.

MPCB hotute chuan PM2.5 hi chuapa lut awlsam, paih chhuah leh theih si lo a tang ta tlat thin a nih avangin a pawl zual niin an sawi a. Kumtluana boruak dinhmun thlirin Aizawl khawpui boruak hi a kum telin a letin a bawlhhlawh tial tial a ni tih a tilang a ni, an ti a. Boruak tibawlhhlawh thei thil hal lo tura mimal, pawl leh sawrkar pawhin tan lak deuh deuh a pawimawh an tih thu sawiin mihring hriselna hi thupui bera neih theuh ni se a duhawm an tih thu an tarlang baw.

(Desk)



TLAIZAWNG PARADISE

Ni hnih awh Phuaibuang Tlaizawng Paradise chu Naktuk, Thawhlejni atang khian hman tan a ni dawn a, Tourism department hotute'n Akashvani Aizawl news an hrilh danin hemi rual tho hian Tuivai lui-ah nghakuai chiah runpui buatsaih nghal a ni dawn a ni.

Nghakuai chiah runpui hi assembly speaker Pu Lalbiakzama'n Thawhlejni chhun lai dar 12-ah a hawng ang a. Zan dar 7 atangin zan lam hun a intan ang a. Speaker leh Phuaibuang VCP-in thu an sawi bakah Thangromawia, tualchhung zaithiamte an zai baw ang. A tuk January ni 7-ah chuan Phuaibuang VC leh tlawmngai pawl kaihhruaina hnuai chhun lamah adventure sports huaihawt a ni dawn a, ramngaw hnuai a thui tak kal (trekking), ke a zin (hiking) leh puka luh te a awm ang a. Mark Events in engkim buaipui-in puan-in kaiha ramhnuai a zan riah pawh a theih dawn a, sleeping bag keng tan chuan puan-in kher lovah pawh a riah theih dawn a ni. Zan dar 7 atangin zaithiamte nena hun hman leh a ni ang a. Hetah hian Tourism Minister Pu Lalnginglova Hmar pawhin a hmanpui dawn a ni.

A tan ni a Tuivai luia nghakuai chiaha hmun tur hi YMA-in sangha an humhalh lai a ni a, sangha a tam hle tura ngaih a nih thu Tourism department hotute chuan an sawi a. A hmunah nghakuai lei tur a awm ang. Tlaih Phuaibuang khua a luhin khawtlangin an siam chaw ei tur a awm ang - Hmar bai dik tak sa tui tak tak a awm dawn a. Ei man pek a ngai a, ei man hi Phuaibuang khua-in an tel vek dawn a ni. Zana hian Tourism Minister uapna hnuai-ah Taitea, BZi Tochwawng, Zothana leh Thangromawia te an zai ang. Tourism department chuan khawtlang huaihawta zinmite hip (community-based tourism), adventure tourism leh ramngaw hmanga zinmite hip eco-tourism hi Mizorama uar deuh deuh an tum thu an sawi a ni.

(Desk)



DRUG-RELATED FATALITIES

Excise & Narcotics department chhinchhiah danin nikum 2025 chhung khan Mizoram-ah ruihhlo kaihhnawh avangin mi 111 an thi a, kum 20 liam ta chhunga ruihhlo kaihhnawih avanga thi an tam ber kum a ni.

Excise & Narcotics chhinchhiah bakah Police lam chhinchhiah danin nikum chhunga ruihhlo kaihhnawih avanga thi 111 zinga mi 93 chu mipa an ni a, 18 chu hmeichhia 18 an ni. Hei hi kum 2004 hnu Mizoram chhunga ruihhlo kaihhnawih avanga thi an tam ber tum a ni. Nikum September thla atanga Mizoram sorkarin ruihhlo do

beihpui thlakna 'Operation Jericho' a kalpuihnu-ah ruihhlo lo lut chu nasa taka a tlem phah rualin, ruihhlo avanga thihna a pung thung a, kum 2024-ah ruihhlo avanga thi mi 67 an awm laiin, nikum-ah erawh mi 111 an awm a ni. Kum 2004 kha Mizorama ruihhlo vanga thi tam ber kum a ni a, hemi kum hian ruihhlo hmansual vangin mi 143 an thi a. Central YMA chuan Ruihhlo Do chu kum puanah hmaningin SRS dinin nasa taka ruihhlo do a ni a, a kum leh, 2005-ah chuan ruihhlo vanga thi zat hi 42-ah a tla thla a ni.

He ti hian kum 1984 a heroin avanga nunna chan pakhat an chhinchhiah tan atanga nikum kum tawp thlenga Mizorama ruihhlo vanga nunna chan zat chu mi 1,990 an tling tawh a, an zinga 1,746 chu mipa niin hmeichhia 244 an awm bawk. Ruihhlo vanga thite hi chawhrualin kum 14 leh kum 57 inkara upa an ni. Mizo thalaite'n kum 1990 chho vel atanga an hman sual tan nachhawkna chak tak spasmo proxyvon leh parvon spa hian nunna a suat tam ber a, sorkar laipui-in siam chhuah a khap hnu-ah kum 2017 atang kha chuan he damdawi avanga thi hi an awm zui ta lova. A dawt lehah chuan heroin emaw damdawi dang chi hrang hrang tihpawlh vanga thi an tam leh a, heroin vanga thi in a dawt a ni.

(Corr)

<><><>

LAWNGTLAI OPERATION JERICHO

Ruihhlo do beihpuithlakna Operation Jericho, Lawngtlai District a kalpui mekah ruihhlo kaihnhawihah thubuai 76 ziahluh a ni tawh.

Mizoram sorkar ruahmannain, ruihhlo do beihpui 'Operation Jericho' chu Lawngtlai district ah Bawrsap hova ruahmanna siam angin kumhlui October ni 13 atang khan chhum lo chat lovin kalpui a ni a. Excise and Narcotics department lamin an chhinchhiah danin, ruihhlo leh zu kaihnhawihah thubuai 76 ziahluh a ni tawh a. Zu bakah damdawi, ruih na'na hman chi thahnem tak man a ni. Operation Jericho ah hian Lawngtlai bakah Sangau leh Bualpui Ng Police ten ngawrh takin an kalpui bawk a, Tlawmngai pawl nen thawhhona tha tak nen Duty Post ah te chhun-zan zawmin Excise, Police leh Tlawmngai pawl te duty thinin, lirthei kalvel te an enfiah thin.

Lawngtlai district bawrsap Pu Donny Lalruatsanga chuan Operation Jericho chu Sorkarin kumin March thla thleng a pawhsei vangin Lawngtlai District chhungah pawh ngawrh zawkin kalpuizui tum a ni a ti. Excise leh Police lam hotute chuan Operation Jericho kalpui a nih avangin ruihhlo a vangin hunpui vuakvetah pawh boruak a nuamin a muanawm phah niin an sawi.

(Lalnggheta Ralte, PTC Lawngtlai)

<><><>

CHOLERA

Tuihri leng avanga Siaha district leh Myanmar inkar ramri khar chu vawiin atangin hawn a ni dawn ta.

Siaha district Additional DC Pu Abraham Beirazi Khithie chuan tun dinhmunah tuihri natna vei an awm tawh loh avang leh tuihri lenna khawmite an biak kualna-ah hri darh a awm tawh bawk loh avangin nimin thlenga Myanmar ramri khar tura thupek lo awm tawh chu pawhsei a ngai tawh lova an ngaih thu Akashvani Aizawl news a hrilh a. Chuti a nih chuan vawiin atangin Myanmar ramri a inkalpawhnate hawn a ni tawh dawn niin a lang. Puan tawh angin nikum November thla khan tuihri avangin Siaha district-ah mi 3 an thi a. December thla chawhnu lam khan Tipa community health centre (CHC)-ah tuihri natna vei enkawl 6 an awm leh avangin Addl. DC hian nikum December ni 23 khan Myanmar ramri kharna thupek hi a chhuah a. January ni 4 thleng khar phawt a nih tur thu a thupek chhuahah chuan tarlan a ni.

He tih lai hian district thenawm Lawngtlai district-ah pawh tuihri leng hi a zia-awm tawh a. December thla laihawl vela Lawngtlai a Lairam Christian Medical Centre & Hospital a mi 8 dahluh bak kha chu tuihri kai thar an awm tawh lo niin an sawi a. Lawngtlai district bawrsap Pu Donny Lalruatsanga chuan December ni 23 a Myanmar ramri kharna thupek a chhuah chu thil thleng thar engemaw a awm leh a nih loh chuan tun kar Inrinni (January ni 10) khian hlih tum a nih thu a sawi bawk. Puan tawh thin angin Lawngtlai district-a Kakichhuah khua-ah November thla khan tuihri avangin mi 6 an thi a, December thla khan mi 4 thi lehin mi 10-in nunna an chan tawh a ni.

Lawngtlai leh Siaha district a tuihri leng hi Myanmar ram Chin state chhim lam, a bikin Paletwa township huam chhunga a len vang ni a hriat a ni a. Myanmar ram chhunga tuihri leng hi district pahnih atanga sumdawnga va kalte'n an kai a, chu chu an lo kir lehin tualchhungah a darh ta thin niin an sawi a ni.

(Desk)

<><><>

IIMC

India rama media lam zirna lian zinga mi Indian Institute of Mass Communication (IIMC) chuan kumin atangin Ph. D zirna an hawng thar.

Aizawla North East Regional Campus awm ve mek, Ministry of Information & Broadcasting hnuai din, IIMC-ah hian a tirah chuan Post Graduate Diploma kum khat course hrang hrang a awm thin a. Tunhnaiah University-a kaisantir chhoh mek niin 'Deemed to be University' ah dah a ni a. Nikum atang khan Masters degree kum hnih course hrang hrang dah tan a ni a. Tihchangtlun zelna turin kumin January ni 1 khan Ph.D zirna hi full time leh part-time-a zir theih turin hawn a ni leh ta a ni.

IIMC Vice Chancellor Dr. Pragya Paliwal Gaur chuan IIMC-a Ph.D zir theih a ni ta chu research lama India ram a than zel theihna tura hmalakna pawimawh tak a nih thu a sawi a. Ram mipuite tana tangkai tur leh ram tihmasawn thei tur research project neih tam a tul thu a sawi bawk a ni. IIMC-a Ph.D zir tur hian tun thla chhung hian dilna a thehluh theih a. UGC-NET qualified te tan interview hmachhawn chauh a ngai ang a, a nei lo tan chuan written exam hmachhawn a ngai thung dawn a ni.

IIMC hi Delhi-a a hmunpui bakah India ram chhungah regional campus dang 5 a awm mek a. Aizawla Mizoram University campus chhungah North East Regional Campus a awm a. Aizawl campus bikah hian Post Graduate Diploma in English Journalism zirlai 20 bakah Master in New Media Communications zirlai 14 an awm mek

a, an vaiin Mizoram pawn atanga lo kal vek an nih bakah hmarchhak state atangin zirlai 2 chauh an awm a, a dang chu state dang ami vek an ni.

(PR)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

UNION AGRI

India chuan China lehpelin khawvela buhfai thar chhuak hnem ber a ni tawh tih Union Agriculture and Farmers Welfare Minister Shivraj Singh CHouhan chuan a sawi. Pu Chouhan-a sawidanin ramchhunga buhfai tharchhuah zat chu tonne maktadaui 150.18 chuang a tling tawh a ti a. Tunah chuan khawvel sumdawnna lamah pawh buhfai hi tam tak hralh chhuah tawh a ni a ti.

Union Agriculture Minister Chouhan-a chuan Indian Council of Agriculture Research in a siamchhuah thlai chi tihdanglam 184 a tlangzarh bawk a. Thusawiin Pu Chouhan-a chuan thlai thar tam chi siam chhuah kawngah India chuan nasa takin hma a sawn tih a sawi a. Agriculture officer te chu heng thlai chi te hian loneitute kut a thlen thuai theih nana tan la turin a chah bawk a ni a.

(NewsonAIR)

<><><>

PM

Prime Minister Narendra Modia chuan nimin khan internet kaltlangin National Volleyball Tournament wawi 72 na Uttar Pradesh-a Varanasi ah a hawng. Pu Modia chuan ramchhung hmun hrang hrang atanga infiammi kalkhawmte chu duhsakna hlanin ram hmasawna kawngah infiamna chu a pawimawh hle a ti a. India ram thanna chu volleyball nen tehkhinin thawhhona tha, thiamna inbuk tawk leh tumruhna avang chauhin ram hma sawn thei a ni a ti a. Volleyball ah inrintawkna, thawhhona tha leh tanrualna a pawimawh ang thoin ram hmasawnaah pawh a pawimawh a ni a ti.

(NewsonAIR)

<><><>